



17. august 2012

EM 2012/135

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Innuttaasut qimmeqarusuttut malittarisassat pillugit ilisimatinnissaat kiisalu qimmit pitsaanerpaamik qanoq perorsarneqarsinnaanersut paarineqarsinnaanersullu pillugit 2013-p ingerlanerani paasissutissiinissamut qaammarsaanissamullu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Justus Hansen, Demokraatit)

Tunngavilersuut

Amerlavallaqaat inuit qimmit, nalullugu qanoq qimmeqarnissaq, perorsaanissaq, paarsinissaq qimminillu isumassuinissaq. Tamanna ajornartorsiut arlalinnik kinguneqartarpoq.

Siullermik amerlavallaqaat inunnik qimmilinnik perorsaaninnaangitsut. Tassa imaappoq, qimmit inunnut allanut saassussiniarsinnaasarput. Tamanna nuanniiginnarani – aamma ulorianarsinnaavoq, qimmit kiisortut perorsarnerlutallu kiisisinnaammata taamatullu inunnik uumasunillu allanik upannillutik

Aappasaanik aamma inoqarpoq qimmiminnik naammatunik nerisaqartitsinngitsunik aneerussinerlu ajortunik, qimmip pisariaqartitaanik. Tamanna naammaginngilaq, uumasut paarilluarnissaat eqqarsaatigalugu.

Ullumikkut qimmit qimmillu qimuttut pillugit inatsiseqarpugut ajunngilluinnartumik (Inatsisartut Inatsisaat nr. 18 1998-meersoq allangortinneqarnikuusorlu) ilaatigut tassani qimmit kiisortut inerteqqutaapput, qimmit paannittartut, piunasaqaataavoq qimmit pituutaqartinnissaat imaluunniit pituttarnissaat, qimmit illersorneqarsinnaasumik pineqarnissaat (tassa anniarnissaannut ersinissaannullu illersornissaat) isumassorneqarnissaallu (nerisaqartinnissaat, imertittarnissaat, sananeqaataat, pissusilersuutaat peqqissusaallu illersorlugit).

Aamma kinaluunniit inatsit naapertorlugu uumasup nakorsaanut politiinulluunniit nalunaartussaataavoq, pasitsaanneqarpat qimmit paarinerlunneqartut. Aamma kommunit arlallit malittarisassiunnikuuaat soorlu qanoq qimmeqarniaraanni qinnuteqartoqassanersoq aamma qimmit nalunaarsorneqassanersut piginnittua eqqarsaatigalugu. Taamaattumik allanik inatsisiliornissaq pisariaqarpassinngilaq. Demokraatini isumaqarpugut, ajornartorsiuteqartoqalernerit tamaasa inatsisiliortariaqanngitsugut.

Qulaani ajornartorsiutit marluk eqqarsaatigalugit, Demokraatit isumaat naapertorlugu, paasissutissiissutissanik sanasoqarsinnaavoq, qaammarsaallunilu, qimmitaarniartut ilisimatillugit qimmeqaraanni malittarisassat suut atuunnersut aamma qanoq iliorluni qulakkeerneqarsinnaanersoq qimmip perorsarnissaa, paarinsisaa, isumagilluarnissaalu.

Paasissutissiinermut atatillugu sananeqarsinnaapput allagartarsuit quppersakkallu, kikkunnit tamanit pineqarsinnaatillugit – soorlu kommunip saaffiginnittarfiani, katersortarfinni, atuarfinni il.il. Quppersakkat qimmeqarnissamut akuersissummut ilanngullugit tunniunneqartarsinnaapput. Aamma sarsuatitaaqqanik sanasoqarsinnaavoq, KNR-imi internetikkullu takutinneqarsinnaasunik. Paasissutissiissutissalli ima kiisalu qaammarsaanerup aaqqissuunnissaa Naalackersuisunut isumagisassanngortittariaqarpoq, taakku kommunit, uumasut nakorsaat politiillu suleqatigalugit pineqartumut ilisimasaqarnerussammata.

Pisortanut aningaasatigut allaffissornikkullu kingunissai

Naalackersuisut paasissutissiissutit suliarinissaannut marlussunnillu filmiliornermut atatillugu avataaniillu suleqatissanut sulisussanik aningaasanillu immikkoortitsisariaqassapput. Naatsorsuutigineqartariaqarpoq taakku suliasat inuup ataatsip ukiup ataatsip ingerlanerani suliarisinnaassagai, tassunga ilaassapput atortussat nutsernissaat.

Aningaasartuutit Naalackersuisut ingerlatsinermut atugassaaniik tiguneqartariaqarput, Inatsisartut Inatsisaata nr. 18-p 30. oktober 1998-meersup kingornalu allanngortinneqartup atortinneqarneranut atatillugu.

Kommunit siunnersuutip piviusunngortinnissaanut annikittuinnarmik aningaasaliisariaqassapput. Aatsaalli taamaattoqassaaq paasissutissiissutissat suliarinerannut atatillugu ilisimasaminnik tunniussaqaqartariaqassappata imaluunniit qimmeqarsinnaanermut atatillugu akuersissummik tunisinermut atatillugu paasissutissanik ilanngussinerminni.

Namminersorlutik Inuutissarsiortunut aningaasatigut allaffissornikkullu kingunissai

Siunnersuutip piviusunngortinneqanera namminersorlutik inuutissarsiortunut aningaasatigut allaffissornikkullu kinguneqarnerlunnaviangilaq.

Innuttaasunut aningaasatigut allaffissornikkullu kingunissai

Siunnersuutip piviusunngortinneqanera innuttaasunut aningaasatigut allaffissornikkullu kinguneqarnerlunnaviangilaq.